

Dithero tsa Tirelano mo Kutlwanong

20/2014 Ka Sontaga o o bidiwang Okuli, e le ka 23. 04. 2014

MO LEINENG LA MODIMO O E LENG RARA LE MORWA LE MOWA O O BOITSHEPO!

1. Sefela sa 302 - 277/284
2. **Thapelo:** Morena Jesu, o re itshepise mo boammaruring; Lefoko la gago ke la boammaaruri. Amen.
3. Epistolo ka fa thulaganyong ya 2 e kwadilwe mo go Baefeso 5:1-8a;
Efangele ka fa thulaganyong ya 1 e kwadilwe mo go Luka 9: 57-62.
4. A go ipolelwe tumelo ya bokeresete!
5. Sefela sa 156 - 139/140
6. Thapelo ya mmadi wa thero.
7. Lefoko la thero ka fa thulaganyong ya 6 e kwadilwe mo 1 Dikgosi 19:1-13a, le re: "Mme Ahabe a bolelela Isebele tsotlhe tse Elia o di dirileng le ka fa a bolaileng baporofeti botlhe ka teng ka tšhaka. Ke fa Isebele a roma morongwa kwa go Elia a re: 'A medimo e mpetse, e be e nkokeletse, fa ke sa dire ka botshelo jwa gago kamoso go le kana jaaka o dirile ka matshelo a bone botlhe.' Ke fa Elia a boifa, mme a nanoga a tsamaya go boloka botshelo jwa gagwe, a fitlha kwa Bereseba wa Juta, a tlogela modiredi wa gagwe teng. Mme ene a ya kwa sekakeng ka leeto ka letsatsi, a fitlha a dula fa tlase ga motlopi, a ikopela go swa, a re: 'Jaanong go lekanye, MORENA, tsaya mowa wa me; gonne ga ke a siama go gaisa borre.' A ba a robala, a tlhulamela fa tlase ga motlopi oo, a ba a utlwa moengele a mo ama, a mo raya, a re: 'Tsoga o je!' Ya re a leba, a fitlhela fa tlhogong ya gagwe go le senkgwe se se besitsweng mo matlapeng a a bolelo le modutwana wa metsi. Jaanong a a ja, a a nwa, a boa a robala gape. Mme moengele wa MORENA a tla la bobedi, a mo ama, a re: 'Tsoga o je! Go seng jalo leeto le ka go palela.' Ke fa a tsoga, a a ja, a a nwa, a

tsamaya malatsi a le 40 le masigo a le 40 ka thata ya dijo tseo go ya go fitlha kwa thabeng ya Modimo ya Horebe. Teng a tsena mo logageng, a lala gona. A utlwa Lefoko la MORENA, Modimo wa masomosomo, le tla kwa go ene, le mmotsa, le re: 'O dirang fano, Elia?' A araba, a re: 'Ke lwetse MORENA, Modimo wa masomosomo, ka tlhoafalo; gonne Baiseraele ba tlogetse kgolagano ya gago, ba thubagantse dialetare tsa gago, ba bolaile baporofeti ba gago ka tšhaka, mo go setseng nna ke le nosi fela, mme ba batla go mpolaya.' Mme MORENA a re: 'Tswela kwa ntle o eme mo thabeng fa pele ga MORENA.' Ke fa MORENA a feta, mme MORENA a etelelwa pele ke ledimo le legolo le le thata le le phatlolang dithaba le le thubaganyang mafika, mme MORENA o ne a se yo mo ledimong. Ledimo la latelwa ke thoromo ya lefatshe, mme MORENA o ne a se yo mo thoromong ya lefatshe. Thoromo ya lefatshe ya latelwa ke molelo, mme MORENA o ne a se yo mo molelong; molelo wa latelwa ke phefonyana e tshesane. Ya re Elia a utlwa yona, a ipipa sefathago ka kobo ya gagwe, a tswela kwa ntle, a ema mo mojakong wa logaga, a utlwa lentswe le mmotsa: le re: 'O dirang fano, Elia?' A araba, a re: 'Ke lwetse MORENA, Modimo wa masomosomo, ka tlhoafalo; gonne Baiseraele ba tlogetse kgolagano ya gago, ba thubagantse dialetare tsa gago, ba bolaile baporofeti ba gago ka tšhaka, mo ke setseng ke le nosi fela, mme ba batla go mpolaya.' Mme MORENA a mo raya a re: 'Ikgate motlhala, o ye kwa sekakeng sa Dameseko, o tsene teng, o fete o tlotse Hasaele go nna kgosi ya Siria. O be o tlotse Jehu morwa Nimesi go nna kgosi ya Iseraele; o be o tlotse Elisa, morwa Safate wa Abele-Megola, go nna moporofeti mo boemong jwa gago. Mme go tla dirafala gore yo o falolang mo tšhakeng ya ga Jehu a bolawe ke Elisa. Mme ke tla sadisa ba le 7000 mo Iseraeleng ba mangole a bone a iseng a ke a khubamele Baale, ba melomo ya bone e iseng e ke e mo atle. E rile Elia a tloga teng, a fitlhela Elisa, morwa Safare, a lema ka dipholo tsa dijoko di le 12 di le fa pele ga gagwe, ene a le fa go tsa joko ya some pedi. Jaanong ya re Elia a feta fa go ene, a latlhela kobo ya gagwe mo go ene." Amen.

8. Thero: Phuthego ya Morena, Efangele e e monate mo Testamenteng e kgololo ke e: Elia a tshaba, a rata go tloga mo sefathlegong sa Modimo, mme Modimo ga o tshabe, ga o tlogele Elia. Phuthololang Beibele, lo buise kang yotlhe e e gakgamatsang ya ga Elia mo 1 Dikg. 17, 18 le mo go 19 tse di buang ka ga

moporofeti wa Modimo, e bong Elia, le ka ga kgosi Ahabe, le kgosigadi e e maswe, e bong Isebele yo o neng a sala baporofeti ba kako e le ba medimako e e bidiwang Ašera le Baale. Isebele a bolaya baporofeti ba MORENA. Mme Elia a bolaya baporofeti ba ga Baale mo thabeng ya Karemele. Teng koo re utlwa le ka ga setlhabelo sa ga Elia se se amogetsweng ke Modimo. Ke fa batho bonke ba ne ba bona gore "Modimo ke ona MORENA; Modimo ke ona MORENA." "Elia a ba raya a re: 'Tshwarang baporofeti ba ga Baale, a go se falole ope wa bone.' Ba ba tshwara, mme Elia a ba foloetsa kwa nokaneng ya Kisone, a ba bolaela teng."

Ke fa go simologa lefoko la thero ya kajeno ka go supa gore Isebele o ne a galefile, a batla madi. Ahabe a bolelela Isebele tsotlhe tse di dirilweng ke Elia, bogolo fa a bolaile baporofeti ka tšhaka. Ke fa Isebele a ne a roma morongwa go mmolelela Elia gore "A medimo e mpetse, e be e nkokeletse, fa ke sa dire ka botshelo jwa gago kamoso go le kana jaaka o dirile ka matshelo a bone botlhe. Ke fa Elia a boifa, mme a nanoga a tsamaya go boloka botshelo jwa gagwe, a fitlha kwa Bereseba wa Juta, a tlogela modiredi wa gagwe teng. Mme ene a ya kwa sekakeng ka leeto ka letsatsi, a fitlha a dula fa tlase ga motlopi, a ikopela go swa, a re: 'Jaanong go lekanye, MORENA, tsaya mowa wa me; gonne ga ke a siama go gaisa borre.'"

Ga ke re: re gopola malatsi a a jalo mo botshelong jwa rona, fa go ne go batalala tsotlhe fela, fa pelo e ratile go ema fela, fa motho a ikaya o kwa tlase tlase fela, a hutsafetse, a boifa ka go latlhegelwa ke tsholofelo, fa bopelokgale bo ne bo tloga fela, mme ga tsena go belaela, le go itshwenyegela. Tsotlhe tse di bonwang di a hutsafatsa. Tsotlhe tse di dirwang di maswe fela. Tse ke nang natso ke tsa lefela. Tsotlhe di a boifisa. Ke fa go lebalwa Motlhodi. Ke fa go fela boitumelo. Go a dirafala, fa go lebalwa Mopholosi. Ke fa go boifiwa batho bogolo go Modimo. Ke fa go latlhelwa mo letlalong maraponyana le matlapanyana. Ke fa go batliwa thuso mo go ona, e seng ka go itatlhela mo mabogong a ga Rara yo o mo legodimong. Ke fa motho a ineela mo thateng ya ga Sathane, a sa ipatlele thuso mo go ene yo o mo fentseng, e bong Jesu Keresete, Mofenyi wa molete wa molelo, wa loso. Kana Jesu Keresete ke ene yo o nonofileng le go fenya pelo ya motho e e roromang ka ditherego tsa go sekisiwa ka ntlha ya maleo mo segakoloding. Jesu ke yo o

nonofileng go tiisa dipelo tsa batho ka go di busetsa mo diatleng tsa gagwe gore di duduzwe teng, ka a re utlwela botlhoko, go re thusa, le go re tiisa mo tumelong, jaaka re bona gore go diragetse mo go Elia.

“A ba a robala, a thulamela fa tlase ga motlopi oo, a ba a utlwa moengele a mo ama, a mo raya, a re: ‘Tsoga o je!’ Ya re a leba, a fitlhela fa tlhogong ya gagwe go le senkgwe se se besitsweng mo matlapeng a a bolelo le modutwana wa metsi. Jaanong a a ja, a a nwa, a boa a robala gape. Mme moengele wa MORENA a tla la bobedi, a mo ama, a re: ‘Tsoga o je! Go seng jalo leeto le ka go palela.’”

Ga ke itse gore wena o ikgethetse sekaka sefe go thulamela teng. Ga ke itse gore ka gongwe o tla boela mo sekakeng sa gago, fa o tswa mo kerekeng kajeno. Ga ke itse gore a o mo kotsing ya ga latlha tumelo ya gago ka go bua gore go lekanye jaanong. MORENA, tsaya mowa wa me, gonne ke tshwana fela le borre. Ga ke itse gore dikhutsafalo le ditlalelo tsa gago, le matsapa a maleo a gago a ntsifetse mo go kalo gore di leke go go fetsa, le go go ja fela.

Mme ke itse yo o nonofileng go thusa, yo o nonofileng go thusa le wena, ke yo o go laletsang gore o je mmele wa gagwe, le go nwa madi a gagwe. Nonoga, o tsamaye ka kagiso. Nanoga o tsamaye o nne le tsholofelo e ntšhwa, thata e ntšhwa, boitumelo jo bošwa, le bopelokgale jo bo botoka! Ka gongwe o tla tlhoka moengele yo o tla go amang, le go go tsoseletsa ka go go bolelela gore o tswe mo logageng lwa gago, gongwe mo kgatimping ya gago, o tlogele megopolo e e go tshwenyang mo moweng. Ga ke kgone go go pholosa. Mme Modimo ke o o dirang dikgagamatso. Ga re kgone go ipholosa, le e seng go intsha mo sekakeng kwa re lehang go iphitlha fa pele ga Modimo teng. Mme Modimo o nonofile go go bitsa, le go go busetsa mo gae, o re: Tsoga, o je! Ka go o reetsa, le go o utlwa go tla fela letswalo lotlhe, matshwenyego otlhe, le ditlalelo tsotlhe. O tsoge, o atamele mo boipobolong go amogela kgololo mo maleong otlhe a gago, le go ikanya boitshwarelo jo re bo baakanyeditsweng ka go ja mmele wa Morena Jesu mo selalelong, le ka go nwa madi a gagwe a re a tshologeletsweng go nna boitshwarelo jwa dibe.

Elia o ne a tsoga, a ja, a nwa, a tsamaya malatsi a le 40, le masigo a le 40 ka thata e a e abetsweng ka sejo sele, a ya mo thabeng ya Horebe, kwa Modimo o neng o itshehetseng teng mo phefonyaneng e e tshesane. Mopholosi wa batho o a go laletsa gore o amogele sejo se se boitshepo sa gagwe. Tsoga mo thobalong ya boleo, o je, o nwe. Ka thata ya sejo seo o tla nonofa go tsamaya ka metlha le mo gare ga beke, le fa o le mo sebeteleng, gongwe mo kotsing ya loso, go ya o gorosiwe mo gae. Tsoga, o je ukuba o itshwarelwe maleo a gago. Tsoga, o nwe gore o tiisiwe mo go pholosiwang ga gago. A Morena a go abele tseo ka bopelotlhomogi jwa gagwe. Amen.

9. Thapelo: Morena, Modimo, Mong-wa-thata-tsotlhe, re lebogela bopelotlhomogi jo o re direlang ka jona, wa re fa Morwao yo o tsetsweng a le esi gore e nne Seganka se se re femelang. O re tiise ka Lefoko la gago, le ka Disakramente tsa gago gore re se wele mo dithaelong tsa tsholofologo, mme re gololwe mo thateng ya ga Satane ka Jesu Keresete yo o leng teng, a busa le wena le Mowa o o Boitshepo, Modimo wa nnete, botshabelo jwa rona. Amen

Thapelo ya Morena: Rara wa rona yo o mo legodimong ...

10. Sefela sa 267 - 249/258

A kagiso ya Modimo e e fetang tlhaloganyo yotlhe e boloke dipelo tsa rona le maikutlo a rona mo go Keresete Jesu, Morena, Morepholosi. Amen.

Thero eno e kwadilwe ke K. G. Tiedemann ka ngwaga wa 2013.

Kgatiso le go rongwa ga dithero tseo go tshagediwa ke kopano e e bidiwang The Lutheran Heritage Foundation.